

**Kapisillit pisarisartakkatta qanoq nunami namminermi nerisassatut pitsaanerusumik atorluarneqarsinnaanerit pillugu apeqquteqaatit oqallisissianut siunnersuut.**

(Inatsisartunut ilaasortaq Karl Lyberth, Siumut)

**Akissuteqaatit**

(Aalisarnermut, Piniarnermut Nunalerinermullu Naalakkersuisoq)

Inatsisartunut ilaasortap Karl Lyberthip qanoq Kalaallit Nunaata kapisillit pisarisartakkat nammineq nerisassatut pitsaanerusumik atorluarneqarsinnaanerit pillugu apeqquteqaatit oqallisissianut siunnersuummik nassiussisimavoq. Siunnersuummik saqqummiussisup maluginiarpa, kapisilinnik suliarinnineq tunitsiviit soqutigeqalugu malinnaavigigaat. Tamannalu tunngavigalugu iluaqutaasinnaaqisumik suliffissuarnut taakkununga pisassiissutinik suliassatut immikkoortitsisoqarsinnaasoq.

Aallaqqaataasumik Naalakkersuisut isumaqatigilluinnarpaat, kapisilinnik aalisarnek pillugu apeqqut sammisassaasoq attuumassutilerujussuaq. Minnerunngitsumik kalaallit nioqutissiaannik kalaallinik inuiaqatigiinnik imminnut pilersorsinnaanerit tunngasunik oqallinnermut naleqqiullugu.

Kapisillit amerlassusiannik siunnersuisarneq ilaatigut ICES-imit Pinngortitaleriffik aqutigalugu ingerlanneqartarpoq kattuffimmillu NASCO-mit oqallisigineqartarluni, tassanilu Kalaallit Nunaat ukiuni pingasuni atuuttumik kapisillit pillugit aqutsinissaq pillugu isumaqatigiissuteqarsimavoq. Pinngortitaleriffiup paasititsissutigaa, biologit siunnersuinissaasa saqqummiunneqarnissaat 2012-imi upernaap ingerlanerani naatsorsuutigineqarsinnaasoq. Biologit siunnersuutaat tiguneqareerpat, taava Kalaallit Nunaat juni aallartinnerani NASCO-p ukiumoortumik ataatsimeersuarnerani kapisillit pillugit aqutsinissaq pillugu nutaamik isumaqatigiissuteqarnissaq siunertaralugu isumaqatiginninniassaaq. Nutaamik isumaqatigiissuteqartoqassapput taanna ukioq manna augustip aallaqqaataaniit atutilissaaq.

NASCO-mi isumaqatigiissutaasoq maannakkut atuuttoq naapertorlugu Kalaallit Nunaat augustip aallaqqaataaniit oktoberip naanissaata tungaanut 2009-miit 2011-mut taamaallaat kapisilinniarsinnaavoq nunap nammineq iluani pisariaqartinneqartuinnarnik, tassa imaappoq inuuniarluni aalisarnermik taagorneqarsinnaasumik. Inuuniarnikkut atugassarisat siusinnerusukkut missiliorneqartarsimapput kapisilittut 20 tons missaanniittut, tamannalu annertunerpaajunngilaq imaluunniit pisassiissutinik qummut killissaalluni. Kapisilinnik avammut annissuilluni niuerneq suli inerteqqaataasimavoq.

Soorlu eqqaaneqartutuut kalaallit nioqutissiaannik annertunerusumik imminut pilersorsinnaanissaq piviusunngullaqqoqara. Tassunga atatillugu kapisillit periarfissatsialaasinnaapput. Uanga isumaqarpunga maannakkorpiq annertuumik kapisilinnik imminut pilersuisoqareersoq, tassami ukiuni kingullerni ukiumut 25 aamma 40 tons akornanni pisanik nalunaartoqartartoq. Kapisillit tunitsiveqarnissaannut suli periarfissanik pisariaqartitsisoqassappat, malittarisassat maannakkut pigineqartut erseqqarinnerusumik misissussallugit piareersimavunga. Taamaattorli

erseqqissarusuppara, niuernermit atasumik aalisarnermit avammullu tunineqartussanik tunisassianut tunngatillugu erseqqarissumik killiliineqarmat, tassami biologit siunnersuinerat saqummiunneqartoq neriunartoqarpallaanngimmat.

Kapisilinniarneq pillugu malittarisassat Namminersorlutik Oqartussat nalunaarutaanni nr. 21, 10. august 2002-meersumi aalajangersarneqarsimapput. Nalunaarut taanna aallangortinneqarluni imaluunniit ersarissarneqarsinnaavoq, nunatta iluani nammineq nerisassatut tunisassiassanik pisassiisoqartalersinnaanera siunertaralugu.

Naggasiullugulu eqqaaneqassaartaaq, KNAPK 2002-mi kattuffeqarfinnik NASF-imik (North Atlantic Salmon Fund) aamma ASF-imik (The Atlantic Salmon Federation) isumaqatigiissuteqarmat. Isumaqatigiissutip siunertaa tassa imaani niuernermit atasumik aalisarsinnaaneq pinngitsoortinneqassasoq, kisianni aammattaaq tamakkiisumik aalisarnerup annikillisarneqarnissaa Isumaqatigiissut naapertorlugu aalisartut kapisilinniarnermik unitsitsilluinnartut fondi aqutugalugu aalisarnermik tamatuminnga allangortiterinerminnut aningaasanik tunineqarsinnaasut. Isumaqatigiissut arlaleriarluni sivitsorneqartarsimavoq, maannamullu atuuttoq 2013-ip naalernerani naasussaagaluq KNAPK-p nalunaarutigaa isumaqatigiissut atorunnaarsinneqarsimasoq. NASF-ip ASF-illu aallaavittut takornarianut najukkamut qanittumi kuunni/ kuussuarnilu kapisilinnik aalisarsinnaanermut pisinnaatitaaffinnik attartortitsisinnaaneq soqutigisaraat.

Taamatut oqaaseqarlunga oqaaseqaat ingerlateqqippara neriullungalu Inatsisartut kinguneqartusamik oqallikkumaartut.